

SAMOA

Faatulagaina o Aiaiga

1. Igoa puupuu ma le amataga
2. Isi faatulagaga mo le tofiga o se Pule Faatonu
3. Talosaga tetee i poloaiga a le Pule Faatonu
4. Komisi Faamasino tau Fesootaiga
5. Mafuaaga faaopoopo mo le faalēaogāina po o le teena o le faafouga o se laisene
6. Tau faaee atu lē tumau o sootaga tau fesootaiga
7. Teuteuga faatupulaia
8. Noataga tau le va o tagata

2008, Nu. 18

**O SE TULAFONO e teuteu ai le Tulafono o Fesootaiga
2005.** *[12 Iuni 2008]*

UA FAIA e le Fono Aoao Faitulafono a Samoa i totonu o le Palemene ua potopoto e faapea:

1. Igoa puupuu ma le amataga-(1) E mafai ona taua leni Tulafono o le Tulafono o Teuteuga o le Tulafono o Fesootaiga 2008.

(2) O leni Tulafono e amata faamamaluina i le aso e tuuina i ai le maliega a Le Ao o le Malo.

2. Isi faatulagaga mo le tofiga o se Pule Faatonu – Ua teuteuina le Tulafono Autu i le faaofiina i ai o le fuaiupu ina ua tuanai le fuaiupu 7 e faapea:

“7A Isi faatulagaga mo le tofiga o se Pule Faatonu-

(1) E ui lava i aiaiga o le fuaiupu 6 ma le 7, e mafai e le Kapeneta ona faamaonia le tofiga o se faalapotopotoga talafeagai e faatonuina faale-tulafono i totonu o po o i fafo atu o Samoa e galue o se Pule Faatonu mo faamoemoega o lenei Tulafono.

(2) O se tofiga e faia i lalo o lenei fuaiupu e tatau ona faia i luga o ia tuutuuga ma mo sea vaitaimi e pei ona faamaonia e le Kapeneta, ma e mafai ona faalēaogāina e le Kapeneta i so o se taimi pe afai ua lē toe manaomia lea fuafuaga po o ua manatu ua lē faamalieina ai sini o lenei Tulafono.

(3) O le tofiga o se Pule Faatonu i lalo o lenei fuaiupu e tatau ona faia e tusa ai ma tuutuuga ua faamaonia e le Kapeneta, ma e tatau ona faatino i se isi faiga e ese ai ma faafoeina e tusa ai ma se konekarate ua faamaonia mo lena faamoemoe e le Loia Sili.”

3. Talosaga tetee i poloaiga a le Pule Faatonu – Ua teuteuina le Tulafono Autu i le aveesea o le fuaiupu 11 ma suia i le fuaiupu e faapea:

“11. Talosaga tetee i poloaiga a le Pule Faatonu e faia i le Komisi Faamasino tau Fesootaiga-(1) O se talosaga tetee e mafua mai i se poloaiga, faatonuga, faaiuga, po o le faatinoga o le pule faitalia a le Pule Faatonu, faatoa mafai lava ona faia i le Komisi Faamasino tau Fesootaiga e ala i se Faasilasilaga o se Talosaga tetee ma ia tusa ai ma aiaiga o lenei Tulafono.

(2) E ao ona faaoo atu i le Minisita se Faasilasilaga o se Talosaga Tetee ma e ao ona tuuina atu faatasi ma:

- (a) se siaki tupe i le aofaiga e \$100,000 tala; ma
- (b) se feagaiga tusitusia ua sainia e le tagata talosaga tetee ina ia totogi mea ua faaleagaina ma tau uma e tulai mai i so o se auala mai le fonotaga a le

Komisi Faamasino, le faafoega o ana taualumaga ma so o se poloaiga e faia mulimuli ane e le Komisi Faamasino po o le Pule Faatonu e afua mai i le taunuuga o le talosaga tetee.

(3) E ao foi ona faaoo atu e le tagata talosaga tetee, i lea lava aso, ata o le Faasilasilaga o le Talosaga tetee ma pepa aloaia o lo o faapiii atu ai i le Pule Faatonu ma le Loia Sili ma pe afai e talafeagai ai, i le isi tagata o ia lea e mafai ona avea ma itu tetee po o se vaega auai i le talosaga tetee.

(4) E ao ona faaoo atu le Faasilasilaga o se Talosaga tetee i totonu o le 30 aso ina ua tuanai le aso o le poloaiga, faatonuga, faaiuga, po o le faatinoga o le pule faitalia a le Pule Faatonu lea ua avea ma mataupu autu o le talosaga tetee.

(5) E ao ona faatulaga i le Faasilasilaga o le Talosaga tetee:

(a) le fuaiupu talafeagai o le Tulafono lea na faia ai le faaiuga ua faasaga i ai le talosaga tetee; ma

(b) mafuaaga o le talosaga tetee e ao ona faatulagaina ai faamatalaga auiliili uma ina ia taua manino ai –

(i) o mafuaaga ia ua faamalieina ai le tagata talosaga tetee e faapea o le faaiuga ua faasaga i ai le talosaga tetee sa faavae i luga o se mea sese o faamatalaga moni po o sa sese i totonu o le tulafono, po o ia tulaga uma e lua;

(ii) o mafuaaga ia ua talosaga tetee ai le tagata talosaga tetee i le faatinoga o le pule faitalia a le Pule Faatonu.”

4. Komisi Faamasino tau Fesootaiga – Ua teuteuina le Tulafono Autu i le faaofiina i ai ina ua tuanai le Vaega II se Vaega IIA fou e faapea:

“VAEGA IIA

KOMISI FAAMASINO TAU FESOOTAIGA

11A. O le faavaeina o le Komisi Faamasino tau Fesootaiga-(1) Ua faavaeina nei le Komisi Faamasino tau Fesootaiga.

(2) I so o se taualumaga e faafoeina e tusa ai ma lenei Tulafono, e tatau i le Komisi Faamasino ona aofia ai se sui auai e avea ma taitai ma isi sui auai e toalua (2) ua tofia e tusa ai ma lenei Vaega.

(3) E tatau i le Matagaluega ona tuuina atu le lagolago tau pulega talafeagai i le Komisi Faamasino i so o se taimi e fonu ai i lalo o lenei Vaega o le Tulafono.

11B. Sui Auai e avea ma taitai – E tatau ona avea ma Taitai i le Komisi Faamasino se Faamasino po o se loia ua agavaa e avea ma Faamasino, o ia lea e tatau ona tofia mai lea taimi i lea taimi e le Faamasino Sili pe a manaomia le Komisi Faamasino e fofogaina ma faia se faaiuga o se talosaga tetee i lalo o le fuaiupu 11.

11C. O isi sui auai o le Komisi Faamasino-(1) E tatau ona tofia sui auai e toalua (2) o le Komisi Faamasino e le sui auai o avea ma taitai mai sui auai uma o le Komisi Faamasino mo taualumaga taitasi uma e usuia a le Komisi Faamasino i lalo o lenei Tulafono.

(2) E mafai ona tofia se tagata e avea ma sui auai o le Komisi Faamasino e Le Ao o le Malo, i luga o le fautuaga a le Kapeneta, pe afai o lena tagata:

- (a) e i ai faailoga ma/po o le poto masani i le tulaga tau le tamaoaiga po o le pulega o tupe; po o
- (b) e i ai faailoga ma/po o le poto masani i tulaga faa-inisia tau fesootaiga po o le pulega o pisinisi tau fesootaiga; po o
- (c) e i ai faailoga faa-loia faatasi ai ma se tomai tau fesootaiga.

(3) A o lumanai ai le amataga o se taualumaga a le Komisi Faamasino, e tatau ona manaomia sui taitoatasi ina ia faailoa manino e faapea o ia e:

- (a) leai sana aia faale-tagata lava ia po o sona aafiaga i le mataupu ua finau ai; ma
- (b) e leai sona sootaga i so o se itu ma so o se vaega auai ua feeseeseai lea e mafai ona mautinoa o lo o aafia ai le faaituau o le sui auai.

(4) E tatau ona agavaa se sui auai o le Komisi Faamasino i se totogifuapauina mo le auai, alauni ma isi tupe faaaogā ua faamaonia mai lea taimi i lea taimi e le Minisita.

(5) E mafai e Le Ao o le Malo, i luga o le fautuaga a le Kapeneta, ona faalēaogāina i so o se taimi le tofiga o so o se sui auai o le Komisi Faamasino pe afai o sea sui auai:

- (a) ua lē lelei le mafaufau po o ua lē mafai ona faatino ana galuega tauave i se tulaga tumau ona o lona soifua maloloina;
- (b) ua faamaonia faale-tulafono se soligatulafono e faasala ai i le nofosala i le falepuipui mo se vaitaimi e silia i le lima (5) tausaga;
- (c) ua lē mafai ona tauaveina so o se galuega tauave ua tuuina atu po o ua faaee atu ia te ia i lalo o lenei Tulafono, e aunoa ma se mafuaaga talafeagai; po o
- (d) ua auai i sea gaoioiga lea ua manatu le Komisi Faamasino e feteenai ma aia a le Komisi Faamasino; po o
- (e) e i ai le aia i taualumaga lea ua lē mafai ona faailoa e le sui auai.

11D. Taloina o fonotaga a le Komisi Faamasino e fofogaina ai faaiuga-(1) E tatau ona taloina e le Sui auai e avea ma Taitai le Komisi Faamasino i se taimi vave e pei ona talafeagai ai mo le fofogaina ma le faia o se faaiuga a le Komisi Faamasino i se feeseeseaiga ua tuuina atu i ai e tusa ai ma lenei Tulafono.

(2) E tatau ona fono le Komisi Faamasino i sea taimi ma sea nofoaga, ma e tatau ona faatino ana taualumaga e pei ona fuafuaina e le Sui Auai o avea ma Taitai.

11E. Taualumaga a le Komisi Faamasino-(1) I le noatia ma le fai fuafua i lenei Tulafono, e tatau ona i ai i le Komisi Faamasino malosiaga ma puipuiga o lo o faaaogā i Komisi Suesue i lalo o le Tulafono o Komisi Suesue 1964, e aofia ai:

- (a) puipuiga e tusa ai ma fuaiupu 5 ma le 9 o lena Tulafono; ma
- (b) malosiaga e pei ona aiaia e le fuaiupu 6 o lena Tulafono; ma
- (c) se malosiaga e faafofoga ai i tagata e i ai se aia i se mataupu lea o lo o avea ma mataupu o se taualumaga a le Komisi Faamasino e pei ona aiaia e le fuaiupu 7 o lena Tulafono.

(2) O se tagata o ia lea, i le maea ai ona samania po o ua poloaia e tulai i luma o se Komisi Faamasino po o e tuuina atu so o se tusi, pepa, tusitusiga, po o pepa aloaia i se Komisi Faamasino:

- (a) ua lē mafai ona auai e tusa ai ma manaoga o sea tusi samania; po o
- (b) ua musu e tauto po o le tuuina atu o faamatalaga molimau po o le faia o se tali i ia fesili e pei ona mafai ona tuuina atu i le tagata e so o se sui auai o le Komisi Faamasino e uiga i le mataupu autu o le suesuega; po o
- (c) ua lē mafai ona tuuina atu so o sea tusi, pepa, tusitusiga, po o pepa aloaia,

ua ia faia se soligatulafono ma e tataua ona noatia i se sala tupe e lē silia le 50 iunite tau faasalaga, po o le nofosala i le falepuipui mo se vaitaimi e lē silia le ono (6) masina, po o faasalaga uma e lua.

(3) O taualumaga taitasi uma a le Komisi Faamasino e tataua ona taitaiina ina ia tusa ai ma taiala faavae o le faamasinoga tonu i so o se vaega auai i se tulaga e mafai ai ona faatino i le amanaia ai o le mana'o i so o se mataupu ua tuuina atu e faaauau ai i se tulaga faavavevave e faia ai se faaiuga o le talosaga tetee.

(4) E lē tataua ona i ai se mea i totonu o le faafu'aiupu (3) e aafia ai le aia tataua o le Komisi Faamasino e faatonuina ai e faapea:

- (a) ia tuuina atu faamatalaga tauto e tagata ua faamoemoe e tuuina atu faamatalaga tauto po o le faia o talosaga tusitusia i se Komisi Faamasino; ma

- (b) o le aia tatau e fesiligia ai so o se tagata molimau lea e tatau ona faatapulaaina na o mataupu ia e manatu le Komisi Faamasino e matua tulaga maualuga le aloaia ia e manaomia lo latou suesueina i fesili; ma
 - (c) vaega auai taitasi, ma so o se tagata e aia i ai ua faatagaina e auai i tualumaga a se Komisi Faamasino, e saunia ma tuuina atu talosaga tusitusia, ma ia faapea ona tuuina atu i isi vaega auai ma o latou sui i luga o tuutuuga ua fuafuaina e le Komisi Faamasino; ma
 - (d) isi lava mea e ao ona faia po o poloaiga ia tausisia e faatagaina ai le taimi e tatau ona faia ai le faaiuga o se feeseeseaiga.
- (5) E mafai e le Komisi Faamasino ona faia faaiuga mausali ma mautu e faasino i so o se mataupu tau tualumaga, ma faia poloaiga i lena tulaga.

11F. E mafai ona i ai se sui o le Malo i so o se tualumaga-(1) I tualumaga uma a le Komisi Faamasino, e mafai ona filifilia le Loia Sili e avea ma sui o le Malo, ma i so o sea tulaga, e tatau ona avea ai e faapea o le Malo o se vaega auai i le feeseeseaiga.

(2) E lē mafai ona faia se poloaiga faasaga i le Malo mo le totogiina o so o se tau e fesootai ai i ma so o se tualumaga a le Komisi Faamasino.

11G. Faaiuga a le Komisi Faamasino-(1) O faaiuga uma a le Komisi Faamasino e tatau ona faia aloaia pe afai ua fulisia le vaega toatele o sui auai i le faaiuga.

(2) E mafai e le Komisi Faamasino ona:

- (a) faamaonia, suia po o le fesui ai o le faaiuga po o le poloaiga a le Pule Faatonu;
- (b) tuuina atu le faaiuga po o le poloaiina le toe aveina atu i le Pule Faatonu mo lona toe iloilogia a lē o le tulaga faalauaitetele po o e faasino i so o se mataupu ua faamaoti mai e le Komisi Faamasino;

- (c) poloaiina e faapea o le faaiuga a le Pule Faatonu lea e faasino i ai se talosaga tetee e lē tatau ona aloaia seia vagana ua faia se faaiuga o le talosaga tetee;
- (d) faalēaogāina le talosaga tetee;
- (e) poloaia se vaega auai e toe faafoi so o se aofaiga o tupe i so o se tagata maoti o lo o tuuina atu auaunaga lea ua totogi faasili i se vaega e tusa ai o se poloaiga toe faatonu ua faaee atu e le Komisi Faamasino;
- (f) i le noatia ma le fai fuafua i le fuaiupu 11F(2), ia poloaia le totogiina o tau.

(3) E tatau ona mausali le faaiuga a le Komisi Faamasino ma ia noatia ai vaega auai uma, ma tagata uma ua taua i so o se poloaiga ua faia e le Komisi Faamasino.

11H. E fesoasoani matagaluega ma lala sooupu a le Malo i le Komisi Faamasino-(1) E tatau i Matagaluega ma lala sooupu uma a le Malo ona galulue faatasi ma le Komisi Faamasino ma e tatau ona avanoa e aunoa ma se tau, so o se pepa aloaia po o faamaumauga o lo o ia teuina ia e manaomia e le Komisi Faamasino, po o e mafai ona fesoasoani i le iloiloga ma le faia o le faaiuga o se feeseeseaiga.

(2) E faaaogāina lenei fuaiupu e ui lava i so o se isi aiaiga o so o se tulafono e ese ai.

11I. E tatau ona taofia moliaga faale-tulafono i talosaga tetee-(1) E lē mafai ona faia se taulumaga e faasino i so o se feeseeseaiga tau fesootaiga i totonu o se Faamasinoga i le maea ai ona faatoai atu o se talosaga tetee i lalo o lenei Vaega.

(2) E lē taofia e le fuaiupu lenei so o se tagi ua faia e ala i toe iloiloga faafaamasinoga e faasino i se taulumaga a le Komisi Faamasino.

11J. Faamamaluina o poloaiga - So o se tagata o ia lea ua faatonuina e le Komisi Faamasino po o i lalo o se noataga faale-tulafono e faatino se poloaiga ua faia e le

Komisi Faamasino i lalo o lenei Tulafono, ma o ia lea ua teena po o ua musu e faatino le poloaiga, ua ia faia se soligatulafono ma e tatau ona noatia i le moliaga ua faamaonia faale-tulafono:

- (a) i le tulaga o se tagata moni i se sala tupe e lē silia le 100 iunite tau faasalaga po o le nofosala i le falepuipui i se vaitaimi e lē silia le 12 masina, po o faasalaga uma e lua; po o
- (b) i le tulaga o se kamupani po o isi faalapotopotoga ua tuufaatasia faale-tulafono, i se sala tupe e lē silia le 5,000 iunite tau faasalaga mo se soligatulafono muamua ma le 10,000 iunite tau faasalaga mo se soligatulafono e sosoo ai.”

5. Mafuaaga faaopoopo mo le faalēaogāina po o le teena o le faafouga o se laisene – Ua teuteuina le Tulafono Autu i le faaofiina i ai i le tuanai ai o le fuaiupu 18 se fuaiupu 18A fou e faapea:

“18A. Faalēaogāina i luga o se moliaga ua faamaonia faale-tulafono mo se soligatulafono – E ui lava i le fuaiupu 18, e tatau ona faapea ua faalēaogāina se laisene pe afai ua faamaonia faale-tulafono se moliaga o le kamupani ua laiseneina i so o se soligatulafono ua faia i lalo o tulafono a Samoa ia e aofia ai:

- (a) se elemeni o le lē faamaoni;
- (b) o le mauaina o nisi o faamanuiaga tau tupe mai tagata lautele po o so o se vaega o tagata lautele e ala i le lē tausisia o so o se noatiaga faale-tulafono;
- (c) o le lē usitaia o le faia o se laisene po o se pemitā ua manaomia e le tulafono a o faagasolo so o se vaega o pisinisi a le kamupani ua laiseneina.”

6. Tau faaee atu lē tumau o sootaga tau fesootaiga – Ua teuteuina le Tulafono Autu i le faaofiina i ai i le tuanai ai o le fuaiupu 39 o fuaiupu e faapea:

“39A. Tau faaee atu lē tumau o sootaga tau fesootaiga-(1) E tatau ona i ai i le Pule Faatonu le malosiaga e faatonu ai se kamupani e tuuina atu auaunaga, ina ia faia tau faaee atu o sootaga tau fesootaiga i luga o se tulaga lē tumau, po o:

(a) e tusa ai ma le faiga ua faatulaga mai i totonu o lenei fuaiupu; po o

(b) e faavae i luga o le fua faatatau ua malie i ai le kamupani e tuuina atu auaunaga e tusa ai ma le fuaiupu 39B.

(2) Afai ua faamoemoe le Pule Faatonu e faaee atu se tau lē tumau o sootaga tau fesootaiga, e tatau i le Pule Faatonu ona talosagaina le kamupani o lo o tuuina atu auaunaga ina ia tuuina atu, i totonu o le 14 aso mai le aso o le talosaga ni lipoti o lo o i ai:

(a) fautuaga e faatatau i le tau faaee atu lē tumau talafeagai;

(b) le faavae mo le tau faaee atu lē tumau ua fautuaina; ma

(c) so o se isi lava mataupu ua fuafuaina e le Pule Faatonu.

(3) I le tuanai o le 14 aso na faia ai le talosaga mo lipoti i lalo o le faafuaiupu (2), e tatau i le Pule Faatonu ona iloiloina lipoti ia ua faaoo atu ma so o se isi lava mataupu ua manatu le Pule Faatonu e talafeagai i le fuafuaina o le tau faaee atu lē tumau o sootaga tau fesootaiga.

(4) A o le i faia le faaiuga mulimuli a le Pule Faatonu i le tau faaee atu lē tumau o sootaga tau fesootaiga, e tatau i le Pule Faatonu ona logoina le kamupani o lo o tuuina atu auaunaga, e tusa ai o tau faaee atu lē tumau o sootaga tau fesootaiga o le a faaee atu.

(5) E mafai e le kamupani o lo o tuuina atu auaunaga ona faia talosaga i le Pule Faatonu i totonu o le fitu (7) aso talu ona maua le faasilasilaga i lalo o le faafuaiupu (4) o le tau o sootaga tau fesootaiga ua fuafuaina pe afai ua lē malie so o se isi o i latou i le tau faaee atu ua faatu mai.

(6) I le tuanai ai o le mauaina ma le iloiloina e le Pule Faatonu o talosaga (pe afai e i ai) mai le kamupani o lo o tuuina atu auaunaga, e tatau loa ona tuuina atu tau faaee atu

lē tumau o sootaga tau fesootaiga lea e tatau ona faamalosia mo so o se vaitaimi ua fuafuaina e le Pule Faatonu, ae lē tatau i lea vaitaimi ona sili atu i le ono (6) masina.

(7) E ui lava i le faafuaiupu (6), e tatau ona i ai i le Pule Faatonu le malosiaga a o faagasolo le vaitaimi o se poloaiga lē tumau o sootaga tau fesootaiga:

(a) e suia ai le poloaiga lē tumau o sootaga tau fesootaiga; po o

(b) e faaopoopo le taimi o le poloaiga lē tumau o sootaga tau fesootaiga mo so o se isi vaitaimi pe afai o lea vaitaimi faaopoopo e lē sili atu i le ono (6) masina; po o

(c) le faalēaogāina o le tau faaee atu lē tumau o sootaga tau fesootaiga.

(8) I totonu o le fesuiaiga, faaopoopoina o le taimi po o le faalēaogāina o se poloaiga lē tumau o sootaga tau fesootaiga e tusa ai ma le faafuaiupu (7), e tatau i le Pule Faatonu ona faaogā i le a lava le tulaga talafeagai e tulai mai, le faiga ua faatulaga mai i le faafuaiupu (2) e oo i le (5).

(9) E ui lava i le fuaiupu 36, o so o se poloaiga lē tumau o sootaga tau fesootaiga ua faaee atu e le Pule Faatonu i lalo o lenei fuaiupu e lē manaomia le faia e fua i tau.

(10) O le lē mafai ona tuuina atu o so o se lipoti po o se talosaga e se kamupani o lo o tuuina atu auaunaga i lalo o lenei fuaiupu o le a lē taofia ai le Pule Faatonu mai tualumaga o le fuafuaina o tau faaee atu lē tumau o sootaga tau fesootaiga.

(11) O so o se kamupani o lo o tuuina atu auaunaga e lē faamalieina i le tau faaee atu lē tumau o sootaga tau fesootaiga ua faaee atu e le Pule Faatonu i lalo o lenei fuaiupu e mafai ona talosaga tetee i le Komisi Faamasino e tusa ai ma le Vaega IIA, ae e lē tatau ona faafoe sea talosaga tetee ina ia aafia ai le aogā o le tau faaee atu lē tumau a o faatalitali le faaiuga o le talosaga tetee.

39B. Ia faamalieina kamupani o lo o tuuina atu auaunaga i tau faaee atu o sootaga tau fesootaiga-(1) E mafai e le Pule Faatonu ona faatonu vaega auai e auai i

feutanaiga e fuafua ai ma malilie i ai i tau faaee atu o sootaga tau fesootaiga ua malilie i ai.

(2) Afai o le a lē oo atu le kamupani o lo o tuuina atu auaunaga i se feagaiga i totonu o le lua (2) vaiaso mai le aso na faatonuina ai e le Pule Faatonu e feutagai ai vaega auai, e tataui i le Pule Faatonu ona faaee atu tau faaee atu lē tumau o sootaga tau fesootaiga e tusa ai ma le fuaiupu 39A.”

7. Teuteuga faatupulaia-(1) Ua teuteuina le fuaiupu 71 o le Tulafono Autu i le aveesea o le fuaiupu 71 (2) (b).

(2) Ua teuteuina le fuaiupu 72 o le Tulafono Autu i le aveesea o le fuaiupu 72 (2) (b).

(3) Ia aveesea le fuaiupu 79 o le Tulafono Autu.

8. Noataga tau le va o tagata – Ua teuteuina le fuaiupu 78 o le Tulafono Autu i le faaofiina i ai o le faafuuiupu (4) e faapea:

“(4) E lē tataui ona noatia le Malo ma le Pule Faatonu mo so o se tau po o mea faaleagaina i so o se taualumaga faale-tulafono e faasaga i so o se gaoioiga ua faia i lalo o lenei Tulafono, po o mo so o se lē usitaia po o le teena o le faia o so o se gaoioiga lea ua faatagaina e lenei Tulafono.”

O le Tulafono o Teuteuga o le Tulafono o Fesootaiga 2008 o lo o faafoeina e le Matagaluega o Fesootaiga ma Faamatalaga Tekonolosi.

**Lolomiina e le Failautusi o le Fono Aoaio Faitulafono,
i le pule a le Fono Aoaio Faitulafono.**

